



Spas – značenje i savjeti za njegovo postizanje (Meka)

Hatib: dr. Bender ibn Abdulaziz Belile

24. džumadel-ula 1445. god. po Hidžri / 8. decembar 2023.

Hvala Allahu, Onome Koji je objavio Knjigu, Onome Koji je sve detaljno objasnio, i Koji je otvorio vrata Istine i podario sve što je potrebno da se postigne Njegova nagrada. Svjedočim da nema boga osim Allaha, Jedinog, Koji druga nema, svjedočenjem u kojem nema sumnje niti kolebanja, i svjedočim da je Muhammed, sallallahu alejhi ve sellem, Njegov rob i poslanik, koga je Allah poslao s istinom, Uputom i koji je uzor u lijepom ponašanju, neka su na njega Allahova milost, blagoslov i mir, i na njegovu porodicu i ashabe, i sve one koji ih slijede u dobročinstvu do Sudnjeg dana.

O ljudi, oporučujem sebi i vama bogobožnost, bojte se Allaha, Allah vam se smilovao, jer će uspjeti samo bogobožni i ponizni, a propast će grešnici i sumnjičavi. "O vjernici, bojte se Allaha i budite s onima koji su iskreni!" (Et-Tevba, 119)

O vjernici, uspjeh i spas visoki je cilj i uzvišena težnja kojoj streme istinski trudbenici, i na čijem se putu žrtvuju istinski borci.

Uspjeh podrazumijeva pobjedu i ostvarenje ovosvjetskih i onosvjetskih želja. Ovosvjetski uspjeh podrazumijeva postizanje dunjalučkih užitaka i prohtjeva, a onosvjetski uspjeh podrazumijeva postizanje Allahovog zadovoljstva i Njegovog Dženneta.

Pametan, pronicljiv i razborit je onaj ko svoje misli i svoj pogled usmjeri prema onosvjetskom uspjehu, jer je on najuzvišeniji cilj i vrhunac svih nadanja. Između čovjeka i uspjeha nalazi se jedino snaga volje, tren strpljenja i postojanost srca.

Onosvjetski uspjeh ne može se postići bez vjerovanja i dobrih djela. Allah, džellešānuhu, pohvalio je vjernike zbog njihovog vjerovanja i dobrih djela, a zatim ih je opisao kao "muflihune" – one koji su uspjeli. Uzvišeni kaže: "Njima će Gospodar





njihov na Pravi put ukazati i oni će ono što žele ostvariti.” (El-Bekara, 5) I kaže Uzvišeni: “O vjernici, molitvu obavljajte i Gospodaru svome se klanjajte, i dobra djela činite da biste postigli ono što želite.” (El-Hadždž, 77) I kaže Uzvišeni: “A onaj koji se bude pokajao, i koji bude vjerovao, i koji bude dobra djela činio, on će postići šta je želio.” (El-Kasas, 67)

Temelj onosvjetskog uspjeha su dva šehadeta, koji su vrata islama i osnova vjere. Vjerovjesnik, sallallahu alejhi ve sellem, rekao je: “O ljudi, recite ‘la ilahe illallah’, uspjete će.” (Ahmed i Ibn Hibban)

Onaj ko se bude držao Allahovih farzova, uspio je i spasio se. Jednom je neki beduin došao kod Vjerovjesnika, sallallahu alejhi ve sellem, i pitao ga je o propisanim dužnostima, pa ga je on podučio, a beduin je rekao: “Tako mi Onoga Koji te je odlikovao nad ljudima, neću ništa dodavati niti ću išta oduzeti od onoga što je Allah naredio.” Poslanik tada reče: “Ako je bio iskren u ovome što je rekao, spasio se.” (Buhari i Muslim)

Temelj i osnova farzova, koji vode uspjehu i spasu jeste namaz, “majka” svih ibadeta, stub pokornosti, brana od zla i njegove zavodljivosti i zaštita od šejtana i njegovog zavođenja. Onda ne čudi što se u ezanu i ikamet u namazu poziva na spas. Uzvišeni kaže: “Ono što žele – vjernici će postići, oni koji molitvu svoju ponizno obavljaju.” (El-Mu’minun, 1–2) Vjerovjesnik, sallallahu alejhi ve sellem, rekao je: “Prvo za šta će čovjek polagati račun na Sudnjem danu, od svojih djela, jeste namaz, pa ako namaz bude dobar, spasio se i uspio je, a ako namaz ne bude dobar, tada je propao i upropastio se.” (Tirmizi)

O muslimani, čišćenje od grijeha, pokajanje i vraćanje Allahu put je ka uspjehu i dokaz je dobrote. Uzvišeni kaže: “I svi se Allahu pokajte, o vjernici, da biste postigli ono što želite.” (En-Nur, 31)

Onaj koji spominje svoga Gospodara, sjeća Ga se i govori o Njegovim blagodatima, čini ono što će ga dovesti do uspjeha. Uzvišeni kaže: “O vjernici, kada se s kakvom četom sukobite, smjeli budite i neprestano Allaha spominjite da biste postigli što





želite." (El-Enfal, 45) I kaže Uzvišeni: "I neka su vam zato uvijek na umu Allahove blagodati, da biste postigli ono što budete željeli." (El-A'raf, 69)

Onaj ko bude ispunjavao prava onih kojima ona pripadaju, postići će uspjeh. Uzvišeni kaže: "Zato podaj bližnjemu pravo njegovo, i siromahu i putniku! To je bolje za one koji nastoje da se Allahu umile; ti će postići šta žele." (Er-Rum, 38)

Čišćenje duše od širka, nepravde i lošeg ponašanja uzrok je uspjeha i spasa. Uzvišeni kaže: "Uspjet će samo onaj ko je očisti, a bit će izgubljen onaj ko je na stranputicu odvodi!" (Eš-Šems, 9–10)

Gospodaru naš, povedi nas Svome zadovoljstvu, sačuvaj nas onoga što izaziva Tvoju srdžbu i što si zabranio i učini nas Svojim zaštićenim i bogoboječnim robovima i podari da budemo dio Tvoje spašene skupine!

O vjernici, čovjekova duša neprekidno se nalazi između jake želje za činjenjem dobra i slabljenja želje za činjenjem dobra. Jaka želja rezultira odlučnim činjenjem dobrih djela u svim njihovim formama i vrstama, a slabljenje te želje rezultira ograničavanjem na farzove i neke nafilje – dobrovoljna djela. Odabrani Poslanik, sallallahu alejhi ve sellem, rekao je: "Svako djelo ima svoj 'plamen' (vatru, snagu, želju), a svaki plamen dođe do svog splasnuća, slabljenja. Ko se i u 'slabosti' bude držao moga sunneta, uspio je, a ko se udalji od njega, propao je." (Hadis je zabilježio Ahmed, a prenio ga je Abdullah ibn Amr, radijallahu anhumu.)

Kako će samo biti sretan čovjek kada na Sudnjem danu bude vidio da je tas s njegovim dobrim djelima na mizanu, vagi na Sudnjem danu, pretegnuo tas s teretima, grijesima i upropaštavajućim djelima! E, to će biti uspjeh, a nakon toga je spas! "...oni čija dobra djela prevagnu, oni će šta žele postići." (El-A'raf, 8)

Donosite salavate i selame na onoga koga je Allah poslao kao milost svjetovima, uputitelja svih stvorenja, Muhammeda ibn Abdullaha, vjerovjesnika, Kurejševića, Hašimovića.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

